

Storianan di Un Mucha di Lagoen di Playa.

Skirbi pa Clyde Harms

MI ta hayando hopi anecdota di lectornan di storianan. Pesey mi ta bay haci un capitulo extra, un epilogo, pa inclui tur posibel. Bo tambe por participa! Yuda documenta storianan cu lo bay perdi dia cu nos no tey mas. Mandami bo recuerdonan cu fotonan di e tempo aya. Si bo ta prefera pa'mi bin cerca bo pa hunto nos redacta bo storia. Lo mi haci esey cu mil amor. clydeharms@setarnet.aw

Capitulo 5 - Weganan cu nos tabata hunga. (Parti 1 di 2)

DEN capitulo 2 mi a menciona con muchanan di Lagoen tabata hunga den awanan di Lagoen y rond di Lagoen, pero manera tur mucha di e epoca ey, nos tabata participa tambe den hopi sport na tera y otro actividadnan.

Un di e sportnan cu nos tabata hunga hopi tabata wega di bomba riba e tereno pariba di canchanan di tennis di Tivoli Club. Ey banda tabata biba nos amigonan Leo, Michael y Herman Kuiperi, y Federico (Fidjois), Charles (Tayta), Eric Ponson. Un caya mas leu, den Wilhelminastraat tabata biba Sid (Orea) Frigerio.

Nos weganan di bomba tabata asina popular cu muchanan di otro barionan tambe tabata join nos. Uno tabata Vi Frank cu tabata biba te na Noord. Otro tabata Henflih Fradl cu tabata biba den Nassaustrastraat banda caminda awor tin Peanuts Restaurant. Nos tabata bati di nort pa zuid den direccion di cura di Openbare Werken e otro banda di Zoutmanstraat. Ora Nel bin bati, Tayta cu no tabata papia bon ainda tabata grita "bare werk" (Openbare Werken) pasobra Nel ya a cuminsa muestra su potencia como bateado cu depues e lo usa den baseball. Nel no tabata desapunta Tayta.


Masha hopi biaha nos mester a bula den cura di DOW pa busca bala cu Nel a bati. Hopi tabata bay perdi y asina nos balanan tabata caba.

Polis no tabata gusta mira nos hunga bomba den caya y hopi biaha nan tabata bin stop wega. Atardi ora cu polis tabata bay cas riba nan bicicleta nan tabata haci dificil pa nos. Pesey semper nos tabata pone un mucha wak si polis tabata bini pa nos para wega. Asina cu e polisnan bay, atrobe tabata "Bala! Manda!" Mayoria di nos cu a hunga bomba a hunga softball y baseball añanan despues.

Mi tabata tuma les di piano di Fiechie Eman, yiu di Shon Henny (E prome). Shon Hennie tabata biba den e sugundo piso di e edificio den Wilhelminastraat caminda awo tin Qué Pasa? Restaurant.

Tur e otro studiantenan di Fiechi tabata mucha muher, cu excepcion di un mucha homber cu na edad ey ya tabata muestra preferencia sexual alternativo. Pa mi bay les mi mester a crusa e tereno di bomba. Tocamento di piano, pa mi amigonan di bomba, definitivamente no tabata un actividad pa mucha homber. Mi amigonan tabata yamami pa M.... y cherchami asina tanto cu mi a stop di bay les.

Pa wega di bomba nos tabata



Funda na 1934, Aruba Tivoli Club tabata e prome club cu cancha di tennis pafo di Lago Colony.

usa bala di tenis cu cay pafo di canchanan. Ora cu nos balanan caba nos tabata chercha e hungadonan di Tivoli te cu un ta rabia asina tanto cu e ta dal un bala afo cu su racket. Exactamente lo ke nos tabata kier pa sosode. Nos tabata sa precies ta cua di e hungadonan tabata rabia asina.

Un otro wega cu nos tabata hunga n'e mes luga tabata "tenis di caya", cu racket traha di palo y tambe cu balanan di tenis cu tabata cay pafo di e murayanan di Tivoli Club. Nos tabata pinta e cancha di tenis riba e caya



Polis a pone nos bisiña corta parti di e muraya cu el a lanta pasobra e tabata kita nos bista di lama. Aki e autor na banda drechi cu su ruman.



Wega di kiniki tabata hopi popular.

goal. Despues nos a cuminsa usa un basket di bleki di lechi Klim. Mama tabata consumi cu nos, pasobra nos tabata susha e muraya y plafond cu nos bala sushi. Nos tabata hunga cu bala den cura tambe, y hopi biaha e bala tabata cay den cura di nos bisiña sr. Gustaaf Kuiperi. Sr. Kuiperi no tabata worry mucho cu nos, pero su señora Isa tabata cunsumi ki ora cu nos dreña su cura pa coy e bala. El a haci sr. Kuiperi lanta un muraya di palo casi dos meter halto parti padilanti di e cura. Nos a yam'e Majinot Line, (tabata na cuminsamento di guerra mundial;

di otro. E manera tradicional tabata pa marca un cirkel y un liña algun meter leu. Tur hungador ta pone den e cirkel e cantidad di kiniki cu nan a acorda. Cada hungador ta tira su pijker den direccion di e liña. Esun cu su pijker keda mas cerca di e liña ta cuminsa tira riba e kinikinan den e cirkel. E idea ta pa dal e kinikinan y saca nan for di e cirkel. Tur kiniki cu bo saca ta bira dibo. Oro bo pijker cay net riba e liña, bo ta "dodo". Tabatin pijker di glas mescos cu e kinikinan, pero un poco mas grandi. Esakinan tabatin balor di dos, tres o hasta cinco kiniki,

depende e grandura di e pijker. Cu tempo nos a descubri cu ball bearing tabata bon pijker. Mi tata cu tabata supervisor den Lago a bira un fuente importante p’e pijkernan di staal. A base di nan grandura, nos tabata cambia e pijkernan pa hopi kiniki. Tabatin un pijker grandi cu tabata “pijker di shen”, un papadidjo cu tabata midi 10 cm den diameter.

Nos tabata yama e pijker aki un “stoomwals”, pasobra oro cu e pasa den e cirkel e ta placha cantidad di kiniki su dilanti. Nos amistad cu e piscadonan Venezolano a haci cu nos a conoce y cuminsa hunga e weganan di kiniki cu nan tabata hunga. Un di nan tabata casi mescos cu nos wega, pero enbes di tira un pijker cu bo man, bo ta “flick” un kiniki usando bo duim. E kinikinan cu bo saca di e cirkel ta di bo.

Un otro wega cu e Venezolanonan tabata hunga ta yama “pich’y hoyo”. E ta wordo hunga mescos cu kiniki, pero e meta di e wega ta completamente diferente. Lugar di un cirkel cu kiniki nan tabata haci un “hoyo”, un buraco chikito. E meta di e wega tabata pa hinca bo kiniki den e hoyo y keda “salba”. Si, salba, pasobra e perdedor ta haya castigo fisico. Esun cu su kiniki ta ultimo den wega mester pone un man na mokete y e otro hungadonan ta flicker nan kiniki riba e wesonan di su dedenan.

Mi ta corda cu un dia e hoben conoci como Zorro a yora cu dolor despues di perde algun wega tre’i otro. Nos tabata hunga cu Venezolanonan, pero ora di pone mokete si nos perde, nan tabata tuma cuenta cu nos ainda tabata mucha y nan no tabata flick cu forsa.

E Margariteñonan tambe tabata hunga kiniki pa placa. Nan tabata pone monedanan para den tera, y e meta tabata pa tumba e monedanan abao. Moneda cu bo tira bao ta bira di bo. Debes encuando nos tambe tabata pone nos 10 placa pa nos hunga. E Venezolanonan tabata hunga cu florin of cu moneda di 2.50 florin.

Hisamento di flie tabata hopi popular cu nos. Mi ruman Nel

tabata esun na cas cu tabata e trahador di flie. Nos tabata conoce flie di cruz, flie di cas, flie grandi, flie chikito, tur clase di flie. Nos tabata hunga guera cu flie dor di pone blade di feita na rabo di nos flie y pas’e riba liña di flie di otro muchanan. Cu exito un rato despues e flie contrario tabata drief bay cay te banda di waf chikito.

Un dia Nel cu Rey Franken (el a box profesional como Kid Carpenter despues) a usa un flie como arma psicologico. Recordando Maginot Line, Nel a traha un flie grandi y yene cu ronkiya traha di papel diki p’e ronca duro. Un atardi laat, Nel cu Rey a hisa e flie pariba di Zoutmanstraat y fier e liña te ora cu e flie tabata net riba cas di e pareha Kuiperi. Nan a mara e liña te na top di un pal’i kwihi na cant’i Lagoen y laga e flie ronca manera un leon henter anochi. E tempo ey ningun hende tabata drumi cu airco, asina cu e pareha no a drumi mucho e anochi ey. E siguiente dia polis a bin exigi Nel baha e flie.

Otro wega hopi popular nos tempo tabata wega di trom. E trom nan tabata bini den diferente tamaño, colo y prijs y tabatin varios tienda cu tabata bende nan. Un wega di trom hopi popular tabata “trom saca trom”. Por cierto, tabatin hopi otro wega di trom, pero esun cu tabata mas interesante tabata “Tiro di aire.” E meta di e wega aki ta kibra e trom na suela cu un golpi di aire. Mirando atras, e tabata un meta basta cruel. Pa determina ken su trom ta bay suela, tur participante ta pone su trom drey. E trom cu stop di drey mas prome ta keda riba suela. E otro hungadornan ta purba tira nan trom riba e trom na suela di un moda cu e puy di su trom ta kibra e otro. P’e wega aki e liña di trom mester wordo lora duro, pero no hopi largo. Esaki tabata causa e liña keda pega n’e puy y e trom bons bek riba cabes di e hungador, un experiencia hopi doloroso. Pa mas efectividad nos tabata cambia e puynan di trom cu clabo largo y slijpnan mescos cu nan ta slijp spoor di gaynan

di pelea. Menelio “Chas” Loef-stop, cu despues a bira gran futbolista, tabatin un trom cu puy mas largo cu e trom mes. E tabata pone su pia robes riba e trom na suela y cu un solo tiro e tabata splijt e trom abao den dos. Hopi mucha cu a purba imita Chas a haya puy di nan trom pega den nan pia. E triki di Chas no tabata facil. Un bes un hoben Soto cu tabata biba na Companashi a pasa dilanti di cas na Lagoen cu un bunita trom cu el a caba di cumpra. Nos a convence pa hunga un wega di “Tiro di Aire” cu nos. Ni 10 minut despues ata Soto ta yora “Mi trompo, mi trompo...” Nel a laga Soto su trom manera dos mitar peer.

Tempo cu e soldanan Frances tabata staciona den e edificio dilanti di Fort Zoutman, nos tabatin un club di guera tras di Club Miramar di Douaneronan. Cu rolnan di Landsradiodienst y drumnan bieu di asfalt, nos a traha nos forti y camufle cu takinan di kwihi. Tabatin dos solda, Jaques “Zicaque” y Robert La Fosse tabata gusta duna nos ideanan pa nos club. Nos arma tabata skopet cu ta tira rubber band corta di tube di auto of truck. Despues di cada tiro nos mester a arma e skopet atrobe. E Francesnan a siña nos con por modifica e skopet p’e los 5 of 6 tiro prome cu mester carg’e atrobe. Sieg Eman (ruman di Shon A) tambe tabata pertenece na nos club. E y mi ruman Harold tabata esnan cu e skopetnan mas grandi y potente. Un dia nos a tende cu e club di Rancho tabata pensa di bin e anochi ey pa dristibi nos forti. Nos a prepara bon pa sorprende nan. Nos a yama tur nos miembronan bin trempa y sconde te ora cu e “enemigonan” yega. Meneer Noot tambe a sconde den su cura patras di nos forti cu un search light di su botonan di loads. Ora cu e muchanan di Rancho a yega Meneer Noot a sende su search lite den nan cara y nos tur a cuminsa haci un desorden di otro mundo. No tabatin mucho bringamento; e sorpresa tabata suficiente pa core cu e muchanan di Pabao.



Bista di lama tabata e rason principal cu Mario Harms a muda pa Lagoen. P’e tabata un placer inmenso sinta contempla e bahia di Playa.



Esaki ta manera di flick kiniki cu dede.



Mi ruman Nel a usa un flie como arma psicologico contra nos bosoñanan

AWEMainta
e corant di Toko
Tel: 583-1400 Fax: 583-1444